

ՀԱՇՎԵՏՎՈՒԹՅՈՒՆ

ԸԿԵԻՊ բաժնի կողմից կատարված առանցքային աշխատանքների մասին

Մարզպետարանի ընտանիքի, կանանց և երեխաների իրավունքների պաշտպանության բաժինը 2020 թվականին իրականացրել է բաժնի կանոնադրական խնդիրներից բխող, ինչպես նաև օրվա հրամայականից ելնելով՝ բազմաթիվ գործառնություններ: Ի սկզբանե նախատեսված ամենակարևոր և դժվարին աշխատանքը դա գիշերօթիկ հաստատությունների լուծարման և հատուկ դպրոցների՝ ՏՄԱԿ-ների վերակազմակերպման գործընթացով պայմանավորված հաջորդական գործողությունների ամբողջությունն էր, որը ենթադրում էր երեխաների վերադարձ կենսաբանական ընտանիքներ, դրանք կայունացնելուն և հզորացնելուն զուգահեռ: Սակայն այս կարևորագույն և հիմնարար գործառնությունը բեկվեց սկզբում կորոնավիրուսային հիվանդությամբ պայմանավորված արտակարգ դրությանը հատուկ մի շարք սահմանափակումներով, ապա նաև սեպտեմբերի 27-ին Ադրբեջանի կողմից Արցախի Հանրապետության դեմ սանձազերծված պատերազմի արդյունքում առաջացած և հրատապ լուծումներ պահանջող խնդիրներով: Ուստի զեկույցը պատրաստված է 3 բաժնից:

1. Սեպտեմբերի 27-ից սկսած Արցախի Հանրապետությունից ժամանել է 2531 քաղաքացի: Առաջին փուլում նրանք տեղավորվել են բարեկամների, հարազատների, ընկերների տներում, ինչպես նաև հյուրանոցներում և հյուրատներում: Հետագայում բնակ տարածքի հարցը, նախարարությունների հետ համագործակցության արդյունքում, լուծվել է՝ քաղաքացիներին հանրակացարանային տիպի կացություն տրամադրելով:

Քաղաքացիների տվյալները գրանցվում են համայնքապետարանում, հետո՝ ամփոփվում մարզային շտեմարանում, տվյալները մուտքագրվում են նաև ՀՀ միգրացիոն ծառայության բազա: Ամփոփված առաջնային կարիքների հիման վրա /սնունդ, հագուստ, անկողնային և հիգիենիկ պարագաներ/ կազմակերպվում են այդ կարիքների բավարարմանը ուղղված աշխատանքները:

Մարզպետարանի առողջապահության և սոցիալական ապահովության վարչության և «Արևամանուկ» հոգեբանասոցիալական աջակցության հիմնադրամի հետ համագործակցության արդյունքում առողջապահական և հոգեբանական աջակցության կարիք ունեցող անձինք անմիջապես ուղղորդվել են համապատասխան կառույցներ՝ ծառայություններ ստանալու:

Շիրակի մարզից, պետական միջոցներ հաշվին, Արցախի Հանրապետություն է տեղափոխվել 225 քաղաքացի, ինքնաբուխ, սեփական միջոցներով՝ 756 քաղաքացի:

Արցախի Հանրապետությունից ինքնաբուխ ժամանած 204 դպրոցահասակ երեխա ընդգրկվել է Շիրակի մարզի 43 ուսումնական հաստատությունում, նրանց տրամադրվել են դասագրքեր, գրենական պիտույքներ:

2. Համավարակով պայմանավորված արտակարգ դրության պայմաններում բաժնի մասնագետները թեև հեռավար, սակայն անցել են 7/24 ռեժիմով աշխատանքի, իրականացրել են հեռավար 696 քաղաքացու առաջնային կարիքի գնահատումներ, յուրաքանչյուր քաղաքացու հետ նվազագույնը 3-4 անգամ:

Բոլոր կազմակերպությունների կողմից աշխատանքների մի մասը կազմակերպվել և իրականացվել են հեռավար, իսկ խնամք և պաշտպանություն իրականացնող հաստատությունների, ցերեկային կենտրոնների շահառու երեխաների ընտանիքներին տրամադրվել են սննդի և հիգիենիկ պարագաների փաթեթներ:

Կազմվել են 4 և ավելի երեխա ունեցող բազմազավակ, սոցիալապես անապահով ընտանիքների ցուցակները, տրամադրվել տարբեր բարեգործական կազմակերպությունների, որոնց կողմից այդ ընտանիքները ստացել են բնափրային և հիգիենիկ փաթեթներ:

Կազմակերպվել են հեռավար քննարկումներ կյանքի դժվարին իրավիճակում հայտնված երեխաների հետ տարվող աշխատանքների վերակազմակերպման, վերածածկը բացառելու, անհրաժեշտ տեխնիկական միջոցների անհրաժեշտության, ընտանիքներից բռնության դեպքերի վերաբերյալ ստացած ահազանգերին նոր ձևաչափով արձագանքելու նպատակով: Արդյունքում ՀՀ Շիրակի մարզպետի անմիջական միջամտությամբ, կրթության, մշակույթի և սպորտի վարչության հետ համագործակցված 450 աշակերտի տրամադրվել են տեխնիկական միջոցներ:

3. 2020 թվականի հունվարի 10-ին, ֆինանսական խնդիրներով պայմանավորված, լուծարվել է «Թռչունյան տուն» հաստատությունը: Հաստատությունում գրանցված էր 108 երեխա: Նրանցից 85 -ը վերադարձել է կենսաբանական ընտանիք /եզրակացություն ունեցող 39 և չունեցող 46 երեխա/: Բարձր ռիսկայնություն ունեցող 12 ընտանիքի 23 երեխա տեղափոխվել է թիվ 2 գիշերօթիկ խնամքի հաստատություն:

Ընդհանուր առմամբ 2 պետական և 1 բարեգործական հաստատություններից դուրս է գրվել 104 երեխա: Հաստատությունների բեռնաթափում ծրագրով դուրս գրված բոլոր երեխաները յուրաքանչյուր ամիս ստացել են բնաիրային փաթեթ, էլեկտրաէներգիայի վարձավճար, տարեկան 2 անգամ հագուստ և գրենական պիտույքներ: Ընտանիքների հետ ստորագրվել են միջամտության պլաններ, համաձայն որի՝ անհատական միջոցառումներ են իրականացվել և իրականացվում այդ ընտանիքների կարողությունները զարգացնելուն ուղղված: 2 երեխա մանկատնից վերադարձել է կենսաբանական ընտանիք, 1-ը՝ տեղավորվել է մանկատուն:

Տարածքային հաշվառման է վերցվել և ուղարկվել կենտրոնացված հաշվառման առանց ծնողական խնամքի մնացած 10 երեխայի 7 առանց ծնողական խնամքի մնացած երեխաների թվին պատկանող 1 անձի անձնական գործ:

Շարունակվում է հանրակրթությունից դուրս մնացած երեխաների տվյալների հավաքագրումը և վերլուծությունը: 2020 թվականին բացահայտված 15 դեպքի առնչությամբ իրականացվում են աշխատանքային ծրագրով նախատեսված միջոցառումներ: Ցանկանում եմ հատուկ նշել, որ այս թիվը առկա կրթության ժամանակահատվածում արձանագրված ցուցանիշն է: Երեխաներից 8-ը վերադարձել են հանրակրթություն: 7-ի հետ աշխատանքները շարունակվում են:

Բաժնի նախաձեռնությամբ, համավարակով պայմանավորված սահմանափակումների ընթացքում, անհրաժեշտ սոցիալական դեպքերի վարումը իրականացվեցին աշխատանքային նոր հեռավար ձևաչափով՝ յուրաքանչյուր շաբաթ 2 անգամ, հետ աշխատանքային ժամերին: Մեզ հետ միաժամանակ այս գործին լծվեցին բոլոր կազմակերպությունները, ովքեր այս կամ այն չափով կարող էին օգտակար լինել տվյալ ընտանիքին՝ հանուն երեխայի լավագույն շահի: Արդյունքում 2020 թվականին 85 դեպքի լայնաֆորմատ քննարկում է իրականացվել, այդ թվում ընտանեկան բռնության ենթարկված 4 անձի:

2020 թվականին կրթության առանձնահատուկ պայմանների կարիք ունեցող 255 երեխայի տրամադրվել է վկայագիր: Բաժնի կողմից դեռևս տարեսկզբից կրթության վարչության հետ համագործակցության արդյունքում իրականացվել են մարզի բոլոր տարածաշրջանների հանրակրթական դպրոցների վարչական կազմերի և բազմամասնագիտական թիմերի վերապատրաստում՝ ներառական կրթության իրականացումը սահուն իրականացնելու նպատակով:

2020 թվականի ընթացքում հաշվառվել է 11 որդեգրողի թեկնածու և որդեգրման ենթակա 1 երեխա: